

ԱԶԴԱՐԱՐ

ՏԵՂԵԿԱՏՈՒ ԱՌԱՋՆՈՐԴԱՐԱՆԻ ՀԱՅՈՑ ԸՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻՆ

P.O.Box: 8157, Salmiyeh 22052- Kuwait. Tel: 965-25614392, Fax: 965-25638312, e-mail: prelacy@armenianprelacykw.org

ՆՈՐ ՇՐՋԱՆ, Ժ. Տարի, Թիւ 434, Ուրբաթ, 27 ԱՊՐԻԼ, 2018

ՀԱՄԱՅՆՔԱՅԻՆ

Հսկում՝ ի Յուշ Մեծ Եղեռնի Մէկուկէս Միլիոնին

Համազգայինի Քուէթի Մէկուսի Կազմի կազմակերպութեամբ՝ այս տարուայ Ապրիլեան Եղեռնին նուիրուած հսկումը տեղի ունեցաւ 23 Ապրիլ 2018-ին, Սրբոց Վարդանանց Եկեղեցոյ Սրահին մէջ, հովանաւորութեամբ Թեմիս Բարեջան Առաջնորդ՝ Գերշ. Ս. Մասիս Եպս. Զօպուեանի և ներկայութեամբ՝ Քուէթի մօտ ՀՀ Արտակարգ և Լիազօր Դեսպան ՆՎ Պրն. Մանուէլ Բաղէեանի և իր տիկնոջ:



ՀՀ Օրհներգէն ետք, հանդիսութեան բացումը կատարեց կազմի ատենապետ՝ ընկ. Մեսրոպ Թաւաքեան, որ իր խօսքին մէջ շեշտեց Ցեղասպանութեան յիշողութեան պահպանումը և աւանդումը սերունդէ սերունդ, որ չմարի ժողովուրդի յիշողութիւնը և հատուցման պահանջատիրութիւնը: Ապա ներկայացուեցաւ գեղարուեստական կոկիկ յայտագիր մը, որ ընդգրկեց երգեր, երաժշտական կտորներ եւ ասմունք: Օրդ. Լիւսի Քահքէճեան ներկայացուց Կոմիտասի «Կռունկ» երգը, ապա Կարօ, Փաթիլ և Յովհաննէս Պօղոսեանները, տուտուկով, սրինգով ու ջութակով ներկայացուցին Խաչատուր Աւետիսեանի «Հայոց Հովիկ» երաժշտական կտորը, որմէ ետք «Մայր մեր Հայաստան» երգը հնչեց Տիար Գէորգ Թեմամեանի կողմէ. անոր յաջորդեց Վահագն Դաւթեանի «Իմ Հարեւաններին» ասմունքի կտորի ներկայացումը, Օրդ. Մարիա Սարգիսեանի մեկնաբանութեամբ, որմէ ետք Փաթիլ Պօղոսեան, ջութակով ներկայացուց «Ծիրանի Ծառ»-ը, ապա Լիլա Կարապետեանի մեկնաբանութեամբ ներկայացուեցաւ «Կեանք ու Կոնի» երգը: Երգերուն, դաշնամուրի նուագակցութեամբ իր մասնակցութիւնը բերաւ Տիար Ճորճ Արապաթեան:

Օրուան բանախօս՝ Տոքթ. Ներսէս Սարգիսեան իր խօսքին մէջ հանգամանօրէն անդրադարձաւ Հայկական Ցեղասպանութեան միջազգային ճանաչման երկար գործընթացին և անկէ բխած պահանջատիրութեան հանգրուաններուն և ուղղութեանց իր իրաւական, քաղաքական և ուժերու հաւասարակշռութեան տեսակէտէ: Բանախօսը շեշտեց այն տքնաջան աշխատանքը, որ պէտք է տարուի Հայկական պետութեան և Սփիւռքին կողմէ՝ միասնական ջանքերով, կեդրոնացնելով իրաւական և քաղաքական կարողութիւնները ի խնդիր Ցեղասպանութեան ամբողջական ճանաչման և ապա՝ հատուցման, միաժամանակ կերտելով հզօր տնտեսական, ռազմական և ընկերային հաւասարութեան վրայ հիմնուած երկիր որպէս գրաւական Հայ Դատի լուծման:

Երեկոյի փակման խօսքը կատարեց Թեմիս Բարեջան Առաջնորդ՝ Գերշ. Ս. Մասիս Եպս. Զօպուեանը, շեշտը դնելով հայ ժողովուրդի կեանքին մէջ երեք հիմնական սրբութիւններուն՝ հայրենիքին, եկեղեցոյ կողմէ սրբադասուած նահատակներուն ու սուրբերուն և քրիստոնէական հաւատքին կառչած մնալու անհրաժեշտութեան վրայ:

Հանդիսութեան աւարտին՝ ներկաները հետեւելով Սրբազան հօր, կարմիր մեխակներ զետեղեցին Եկեղեցւոյ մուտքին գտնուող խաչքարին դիմաց և խոնարհեցան ի յարգանս Եղեռնի զոհերուն:

ԱՐՏԱՍԱՆԱԿԱՆ ՄՐՑՈՅԹ



Ուրբաթ, 20 Ապրիլ 2018-ին, Սրբոց Վարդանանց եկեղեցւոյ ներքնասարահին մէջ տեղի ունեցաւ Քուէյթի Ազգային վարժարանի տարեկան արտասանական մրցոյթը:

Բացման խօսքով հանդէս եկաւ վարժարանիս հայերէն լեզուի դասատու՝ Պրն. Ճորճ Արապաթեան: Ան բարի գալուստ մաղթեց ներկաներուն, ապա իր խօսքը փոխանցեց ըսելով. «Այս տարուան մեր մրցոյթը նուիրուած է Հայաստանի առաջին Հանրապետութեան 100 Ամեակին:

Պատահական չէ Թեմայի ընտրութիւնը: Այսօր, երբ համայն հայութիւնը կը նշէ այս պատմական իրադարձութեան 100 Ամեակը մեր աշակերտները եւս իրենց բանաստեղծութիւններով պիտի արտայայտեն իրենց սէրն ու կապուածութիւնը մայր Հայաստանին: Լիայոյս ենք, որ լաւապէս պիտի ներկայացնեն իրենց կտորները»:

Մրցոյթին մասնակցեցեան նախակրթարանի, միջնակարգի եւ երկրորդականի աշակերտները, որոնք իրենց յաջող կատարումներով ներկայացուցին հայրենասիրական զանազան բանաստեղծական կտորներ՝ մերթ յուզելով եւ մերթ ոգեւորելով ներկաները:

Օրուան դատական կազմի անդամներն էին տիկնայք՝ Մայտա Թադոյեան-Մովսէսեան, Դալար Գալեմբեարեան-Տաղլեան, Նարինէ Գոնճայեան-Արապաթեան եւ Պրն. Եղիա Կարպուշեան, որոնք իրենց արդար գնահատումներով՝ չորս խմբակներու մասնակիցներուն առաջին երեք դիրքերը շնորհեցին հետեւեալ աշակերտներուն.-

Ա. Խմբակի մասնակիցները ելոյթ ունեցան ոչ մրցութային կարգով, սակայն ստացան յատուկ գնահատագիրներ:

Բ. Խմբակ
Շաղիկ Ատուրեան՝ առաջին
Արշալոյս Շահպազեան՝ երկրորդ
Մարիթա Թէմամեան՝ երրորդ

Գ. Խմբակ
Լէա Պոտիկեան՝ առաջին
Մարին Օհանեան՝ երկրորդ
Սէլա Յարութիւնեան՝ երրորդ
Լալա Խաչատուրեան՝ երրորդ

Դ. Խմբակ
Մելիք Յ. Մելիքսեթեան՝ առաջին
Աւետիս Տէկիրմէնճեան՝ երկրորդ
Քրիստափոր Սերոբեան՝ երրորդ

Ե. Խմբակ
Ալեակ Մոմճաեան՝ առաջին



Պիաթրիս Մելիքսեթեան՝ երկրորդ
Պօղոս Աւետիսեան՝ երրորդ

Ներկաները միեւնոյն ժամանակ վայելեցին պատրաստուած գեղարուեստական յայտագիրը՝ ունկնդրելով կարգ մը աշակերտներու կողմէ ներկայացուած երաժշտական պատատիկները: Մրցոյթի աւարտին Քուէյթի Ազգային Վարժարանի Տնօրէն՝ Տոքթ. Ներսէս Սարգիսեան իր խօսքը փոխանցեց ներկաներուն, ըսելով որ երբ ունինք սերունդ մը որ զինուած է մշակոյթով եւ տոգորուած հայրենասիրութեամբ, պէտք չէ վախ ունենանք ապագայի նկատմամբ: Ապա ան գնահատեց աշակերտներուն ջանասիրութիւնն ու հայ լեզուին ու հայ գրականութեան հանդէպ իրենց ունեցած սէրը. գնահատեց ծնողները՝ իրենց հոգածութեան համար: Ան իր շնորհակալական խօսքը ուղղեց վարժարանիս հայերէն լեզուի դասատուներուն՝ գնահատելով իւրաքանչիւրին կատարած ակնյայտ աշխատանքը, ինչպէս նաեւ Տիկին Հուրի Տէկիրմէնճեանին եւ Պրն. Վահէ Պաղճեանին կազմակերպչական աշխատանքներուն իրենց բերած աջակցութեան համար: Յատուկ գնահատանքի խօսք փոխանցեց օրուան դատական կազմին, որոնք այս բարդ աշխատանքը սիրայօժար կատարեցին:

ԱՊՐԻԼԵԱՆ ՈԳԵԿՈՉՈՒՄ

Երկուշաբթի, 23 Ապրիլ 2018ին, Քուէյթի Ազգային Վարժարանը արժանատր կերպով նշեց Հայոց Ցեղասպանութեան 103րդ ամեակը: Այս առիթով իւրաքանչիւր դաստիարակ ամփոփ կերպով ներկայացուց եղեռնի պատմականը, անդրադառնալով հոն կատարուած անմարդկային արարքները, հասնելով մինչեւ մերօրեայ իրադարձութիւններն ու յառաջիկայ տանելիք աշխատանքները: Ապա խումբ առ խումբ ուղղուեցան Վարժարանիս նորակառոյց Տիկնիկային թատրոնի ցուցասրահը, եւ



հետաքրքրութեամբ դիտեցին եղեռնը պատկերող պատշաճ ցուցահանդէսը, որ կազակերպուած էր 10րդ դասարանի աշակերտ-աշակերտուհիներուն կողմէ, որոնք համապատասխան բացատրութիւններ տուին իւրաքանչիւր պատկերի շուրջ:

WWW.AZTARAR.COM

Ապա տեղի ունեցավ ծաղկեմատոյց, վարժարանիս շրջափակէն ներս զետեղուած Ծիծեռնակաբարդի յուշակոթողին առջեւ:

Տեղին է նշել, որ աբողջ շաբթուան տեւողութեան աշակերտները պատի թերթեր պատրաստեցին, որոնք ցուցադրուեցան դպրոցի ցուցատախտակներուն վրայ:



Քուէթահայ Մելիք Գարլոն Հայաստանի Մէջ Վայելեց Իր Յաղթանակը



Մելիք Գարլո Մելիքսէթեանը կը յաճախէ Քուէթի ազգային վարժարանի 8-րդ դասարանը: Երբ ուսուցիչներէն տեղեկացած է, որ ՀՀ սփիւռքի նախարարութիւնը «Հայապահպանութեան գործին մէջ նշանակալի աւանդի համար» համահայկական մրցանակաբաշխութիւն կը կազմակերպէ, շատ ոգեւորուած է եւ որոշած է անպայման մասնակցիլ:

Ապրիլ 21-ին, ամփոփելով 2017թ.-ի մրցանակաբաշխութեան արդիւնքները, պարզ դարձաւ, որ Մելիք Գարլոն «Ազատ Արցախ»

եւ «Մայիս՝ յաղթանակներու ամիս» մանկապատանեկան ստեղծագործութիւններու անուանակարգին մէջ արժանացած է 1-ին կարգի մրցանակի:

«Մէկ նկարի մէջ պատկերած եմ այնպիսի պատկերներ, ուր կ'ամփոփուին Հայաստանը խորհրդանշող պատկերները՝ Արարատ լեռը, Եռագոյնը, Ծիծեռնակաբարդի յուշահամալիրը, «Մե՛նք ենք, մեր սարերը» յուշարձանը», - «Հայերն այսօր»-ի հետ զրոյցին ըսաւ Մելիք Գարլոն՝ շեշտելով, որ կտաւր նկարելուն՝ իր աչքին առջեւ յանդիման եւ Եղեռնի ահասարսուտ տեսարանները: Սակայն խաղաղած եւ հոգին հպարտութեամբ լեցուած է՝ յիշելով, որ բոլոր արհաւիրքներէն ետք հայ ժողովուրդը վերածնած է եւ ազատ, անկախ Հայաստան կերտած:

Զրոյցի աւարտին Մելիք Գարլոն շնորհակալութիւն յայտնեց Սփիւռքի նախարարութեան՝ կրկին Հայաստան գալու եւ իր յաղթանակը սեփական հողի վրայ վայելելու հնարաւորութիւն ընձեռելու համար:

www.aztagdaily.com

ՀԱՅԿԱԿԱՆ

Դաշնակցական Նախարարները Հրաժարական Կը Ներկայացնեն

ՀՅԴ հանրային կապերու գրասենեակը հրապարակած է հաղորդագրություն մը՝ յայտարարելով, որ Հայաստանի տարածքային կառավարման և զարգացման նախարարի ժամանակաւոր պաշտօնակատար Դաւիթ Լոքեանը, Հայաստանի կրթութեան և գիտութեան նախարարի ժամանակաւոր պաշտօնակատար Լեւոն Մկրտչեանը, Հայաստանի բնապահպանութեան նախարարի ժամանակաւոր պաշտօնակատար Արծուիկ Մինասեանը, ինչպէս նաեւ Շիրակի մարզպետ Արթուր Խաչատրեանն ու Արագածոտնի մարզպետ Աշոտ Միմոնեանը ներկայացուցած են իրենց հրաժարականի դիմումները:

Մինչ Հայաստանի Մէջ Չանգուածային Անհնազանդութեան Դրսեւորումները Կը Յամենան՝ Լարուածութիւնը Լիցքաթափելու Ճիգերը Շարունակուեցան

Չորեքշաբթի օր առաւօտ նախատեսուած վարչապետի պաշտօնակատար Կարէն Կարապետեանի եւ Քաղաքացիական պայմանագիր կուսակցութեան հիմնադիր Նիկոլ Փաշինեանի միջեւ բանակցութիւնները չեղեալ նկատուեցան մետասաներորդ պահուն, ինչ որ պատճառ հանդիսացաւ, որ զանգուածային ընդվզումի շարժումները շարունակուին Հայաստանի Հանրապետութեան մէջ: Մինչ այդ, ընդդիմադիր «Ելք» դաշինքը Չորեքշաբթի օր պաշտօնապէս պատգամաւոր Նիկոլ Փաշինեանի թեկնածութիւնը առաջադրեց վարչապետութեան պաշտօնին համար:

Մակայն հակառակ զանգուածային անհնազանդութիւններու շարունակութեան, անոնց զուգահեռ շարունակուեցան քաղաքական ջանքերը լարուածութիւնը հանդարտեցնելու եւ ներկայ տագնապը սահմանադրութեան տրամադրութեանց ծիրին մէջ լուծելու: Եւ զարմանալի չէր, որ այս առումով հիմնական շահագրգիռ կողմը պիտի ըլլար ՀՅ Դաշնակցութիւնը՝ մեկնելով այն համոզումէն, որ այս կացութենէն շահաւոր պետք է ըլլան պետութիւնը եւ ժողովուրդը: Այս մտածողութենէն մեկնելով ալ, Չորեքշաբթի օր ՀՅԴ Հայաստանի Գերագոյն մարմինը հրապարակեց յայտարարութիւն մը, որուն մէջ ան յայտարարեց իր մասնակցութեան դադրեցումը կառավարող համաձայնական դաշինքին (տեսնել՝ առանձին):

Նիկոլ Փաշինեան – Կարէն Կարապետեան Հանդիպումը Չկայացաւ

Հայաստանի Հանրապետութեան վարչապետի պաշտօնակատար Կարէն Կարապետեանի եւ Հայաստանի Հանրապետութեան Ազգային ժողովի պատգամաւոր Նիկոլ Փաշինեանի միջեւ Չորեքշաբթի օր առաւօտեան նախատեսուած հանդիպումը չկայացաւ:

Այս գծով յայտարարութիւն հրապարակեց վարչապետը՝ նշելով, որ Ապրիլի 25-ին նախատեսուած հանդիպումը տեղի չունեցաւ, քանի որ Փաշինեանը միակողմանի կերպով առաջադրած է նոր պահանջներ: Յայտարարութեան մէջ նշուած է.

«Ինչպէս գիտէք, 25 Ապրիլին պետք է տեղի ունենար իմ եւ Նիկոլ Փաշինեանի հանդիպումը՝ ստեղծուած իրավիճակը քննարկելու եւ լուծումներ փնտռելու համար:

Կը տեղեկացնեմ, որ նախապէս յայտարարուած հանդիպումը տեղի չունեցաւ, քանի որ Նիկոլ Փաշինեանը միակողմանի կերպով առաջադրած է նոր պահանջներ, մասնաւորապէս՝

հանդիպման ձեռնարկի, օրակարգի եւ լուսաբանման առումով: Վերջինիս կողմէ առաջարկուած է մեր կողմէն մասնակցող անձերու ցանկը, ինչպէս նաեւ յայտարարուած, որ պիտի բանակցի բացառապէս իր օրակարգին շուրջ: Սահկա կը նշանակէ ոչ թէ բանակցութիւն կամ երկխօսութիւն, այլ բացառապէս սեփական տեսակետը, օրակարգը հնչեցնել՝ ընդհուպ մինչեւ մեր բանակցողներն իսկ մեր տեղը որոշելով: Ունենալով որոշ փորձառութիւն բանակցութիւններու վարման հարցով՝ երբեւէ նման ձեռնարկով բանակցութիւններու մասին չեմ լսած:

Մտահոգ ըլլալով ստեղծուած իրավիճակով՝ իբրեւ գործադիր իշխանութեան ղեկավար, ունենալով պարտաւորութիւն ապահովելու մեր երկրի բնականոն վիճակը, կը դիմեմ Հայաստանի Հանրապետութեան նախագահին իր նախընտրած ձեռնարկով կազմակերպելու հանդիպում խորհրդարանական եւ արտախորհրդարանական քաղաքական ուժերու լայն շրջանակներու մասնակցութեամբ՝ քննարկելու ստեղծուած ներքաղաքական իրավիճակը եւ հնարաւոր հանգուցալուծման ուղիները՝ ընդհուպ մինչեւ արտահերթ խորհրդարանական ընտրութիւններու իրականացում»:

Բակօ Սահակեանն Ու Նիկոլ Փաշինեանը Հանդիպած Են

Արցախի Հանրապետութեան նախագահ Բակօ Սահակեան 24 Ապրիլին Երեւանի մէջ հանդիպում ունեցած է Հայաստանի Քաղաքացիական պայմանագիր կուսակցութեան հիմնադիր Նիկոլ Փաշինեանին հետ:

Հանդիպումի ընթացքին անդրադարձ կատարուած է Հայաստանի ներքաղաքական իրավիճակին:

Նախագահ Սահակեան կարելոր նկատած է վիճայարոյց բոլոր հարցերը երկխօսութեան միջոցով ու օրէնքի սահմաններուն մէջ լուծելու եւ երկրին մէջ կայունութեան պահպանման անհրաժեշտութիւնը:



Միացեալ Նահանգներ Կը Յորդորեն Հայաստանին՝ Ապահովել Իշխանութեան Խաղաղ Փոխանցումը

Միացեալ Նահանգներու արտաքին գործոց նախարարութիւնը հրապարակած է Հայաստանի մէջ տեղի ունեցող իրադարձութիւններուն վերաբերեալ յայտարարութիւն՝ յորդորելով ընթանալ երկխօսութեան ճամբով:

Միացեալ Նահանգներու արտաքին գործոց նախարարութեան բանբեր Հետըր Լոուրըթի յայտարարութեան մէջ կ'ըսուի. «Յառաջիկայ օրերը պատմական կարելիութիւն կու տան Հայաստանի ժողովուրդին եւ անոր կողմէ ընտրուած ղեկավարներուն, որովհետեւ անոնք կը սկսին նոր կառավարութիւն ձեւաւորելու հոլովոյթին:

«Բոլոր կողմերուն կոչ կ'ուղղենք՝ կառուցողական դիրքորոշում դրսեւորելու Հայաստանի Սահմանադրութեան իրաւական ծիրին մէջ օրէնքի գերակայութեան պայմաններուն մէջ ապահովելու իշխանութեան խաղաղ փոխանցումը:

«Կ'ակնկալենք սերտօրէն համագործակցիլ նոր կառավարութեան հետ՝ Միացեալ Նահանգներու եւ Հայաստանի միջեւ հասարակաց հետաքրքրութիւն ներկայացնող ոլորտներու ծիրին մէջ:

«Իբրև Հայաստանի բարեկամ ու գործընկեր՝ մենք կը յորդորենք հայ ժողովուրդը դիմելու երկխոսության՝ իրենց գերիշխան ապագան ժողովրդավարական եւ խաղաղ ճամբով ձեւաորելու նպատակով»:

Նշենք, որ նախարարության բանբեր Հետքը Նոուրթթ մէկ օր առաջ Հայաստանի իրադարձութիւններուն վերաբերեալ յայտարարած էր. «Մենք շնորհակալ ենք վարչապետ Սերժ Սարգսեանին երկար տարիներու ծառայութեան ու Միացեալ Նահանգներ-Հայաստան ամուր գործընկերութեան մէջ անոր ներդրումին համար: Մենք կ'ակնկալենք, որ անոր յետնորդը կը յայտարարուի ժողովրդավարական գործընթացով՝ օրէնքներուն ու Հայաստանի ստանձնած միջազգային պարտաւորութիւններուն համաձայն: Մենք կ'ակնկալենք սերտ համագործակցութիւն նոր կառավարութեան հետ»:

ԵՆԽՎ Համազեկուցողները Սերժ Սարգսեանի Քայլը Համարձակ Որակած Են

Եւրոպական խորհուրդի խորհրդարանական վեհաժողովի Հայաստանի հարցով համազեկուցողներ Ճուզեփիէ Կալաթի (Իտալիա) ու Եուլիա Լովոճքինա (Ուքրանիա) արձագանգած են Երեւանի մէջ տեղի ունեցող վերջին իրադարձութիւններուն: Այս մասին կը յայտնէ ԵՆԽՎ-ի պաշտօնական կայքը:

«Մենք կ'ողջունենք վարչապետ Սերժ Սարգսեանի համարձակ որոշումը՝ հրաժարելու պաշտօնէն երկրի մէջ աճող լարուածութիւնը մեղմելու նպատակով: Յոյսով ենք, որ այս բոլորը կը յանգեցնեն նոր եւ կառուցողական երկխոսութեան երկրի բոլոր քաղաքական ուժերուն միջեւ՝ նպատակ ունենալով գտնել տիրող իրավիճակին վերաբերեալ մնայուն լուծում՝ համաձայն սահմանադրական համապատասխան դրոյթներու», ըսուած է համազեկուցողներու յայտարարութեան մէջ:

Միեւնոյն ժամանակ անոնք ընդգծած են, որ խաղաղ ցոյցերու ժամանակ բոլոր բերան ենթարկուածները պէտք է ազատ արձակուին, պէտք է լիակատար յարգանք ցուցաբերուի խաղաղ հաւաքներ իրականացնելու իրաւունքին: Համազեկուցողները մտահոգութիւն յայտնած են Հայաստանի Հանրապետութեան մարդու իրաւունքներու պաշտպան հաղորդումներուն առնչութեամբ՝ այն մասին, որ համացանցի մէջ աւելցած է անհատներու դէմ ստելութեան խօսքն ու անգամ բռնութեան կոչերը՝ յորդորելով յարգել բոլոր քաղաքացիներուն հիմնարար իրաւունքները:

Ճուզեփիէ Կալաթի ու Եուլիա Լովոճքինա նշած են, որ պիտի շարունակեն հետեւիլ Երեւանի մէջ տեղի ունեցող զարգացումներուն:

Արսէն Համբարձումեան. «Պարոն Փաշինեանի Հետ

Կը Նախատեսենք Հանդիպում Ունենալ»

Պարոն Փաշինեանի հետ կը նախատեսենք հանդիպում ունենալ: Այդ մասին «Նիուզ»-ի թղթակիցին հետ զրոյցի մը ընթացքին նշած է ՀՅԴ Հայաստանի Գերագոյն մարմինի ներկայացուցիչ Արսէն Համբարձումեանը:

«Կը նախատեսենք հանդիպում ունենալ, քննարկել այն բոլոր հարցերուն շրջանակները, որոնք մեզի համար կարեւորութիւն կը ներկայացնեն: Եւ այդ քննարկումին եւ մտեցումներուն արձանագրումէն կախեալ են մեր հետագայ քայլերը», նշած է Արսէն Համբարձումեան:




«Ելք» Դաշինքը Հայաստանի Վարչապետի Պաշտոնին Առաջադրած Է Նիկոլ Փաշինեանի Թեկնածութիւնը

«Ելք» դաշինքը Հայաստանի վարչապետի պաշտոնին առաջադրած է Նիկոլ Փաշինեանի թեկնածութիւնը: Որոշումը կայացած է Ազգային ժողովի «ԵԼՔ» խմբակցութեան Չորեքշաբթի օր գումարած նիստին:

Քաղաքացիական պայմանագիր կուսակցութեան ներկայացուցիչ Ռուբէն Ռուբինեանը ըսած է, թէ իրենք կ'ակնկալեն, որ Ազգային ժողովի մէջ ներկայացուած բոլոր խմբակցութիւնները առաջադրեն Նիկոլ Փաշինեանի թեկնածութիւնը:

ՀՅԴ Գերագոյն մարմնի յայտարարութիւնը



Ժողովրդային շարժման արդիւնքում Հայաստանում ստեղծուել է մի իրավիճակ, որն արդէն օրեր շարունակ լարուածութեան մէջ է պահում ողջ հասարակութեանը:

Բարեբախտաբար, մինչ այս պահը հնարաւոր է եղել խուսափել իրավիճակի հանգուցալուծման վատթարագոյն տարբերակներից: Անցնող օրերի ընթացքում ՀՅ Դաշնակցութիւնը հետեւողական ջանքեր է գործադրել համախոհութեան ձեւաւորման, երկխօսութեան միջոցով երկրի ու ժողովրդի շահերից բխող ընդունելի եւ ողջամիտ լուծում գտնելու ուղղութեամբ:

Այսպէս սակայն երկար չի կարող շարունակուել: Կարող են առաջանալ լուրջ մարտահրաւերներ: Համոզուած ենք, որ ստեղծուած իրավիճակը պէտք է հանգուցալուծուի բացառապէս սահմանադրականութեան եւ օրէնքների շրջանակներում:

Հաշուի առնելով առկայ իրավիճակը՝ յայտարարում ենք քաղաքական կոալիցիային մեր մասնակցութեան

դադարեցման մասին:

Առ այդ, Ազգային ժողովը պէտք է ընտրի ժողովրդի վստահութիւնը վայելող վարչապետ, որի ձեւաւորած կառավարութեան մշակած՝ պետութեան ներքին եւ արտաքին քաղաքականութիւնը ներառող ծրագիրը պէտք է նպատակ հետապնդի՝

- ա) լիցքաթափել ներքաղաքական լարուածութիւնը,
- բ) յաղթահարել քաղաքական ճգնաժամը,
- գ) յստակ առաջնահերթութիւններ նախանշելով երաշխաւորել կուտակուած խնդիրների լուծումը,
- դ) լիարժէք ժողովրդավարական պայմանների ապահովմամբ նախապատրաստել եւ անցկացնել արտահերթ խորհրդարանական ընտրութիւններ:

25 Ապրիլ 2018թ.

www.hayernaysor.am

ՄԻՋԱԶԳԱՅԻՆ

«Պէտք է Պատրաստուիլ Սուրիոյ մէջ Սադրանքներու Կրկնութեան» Կ'ըսէ Լաւրով

Ռուսիոյ արտաքին գործոց նախարար Մերկել Լաւրով յայտնեց. «Տակաւին Սուրիոյ «Էս-300» համակարգեր յանձնել չորոշեցինք»:

Ան նշեց. «Հակառակ ամերիկացիներուն եւ եւրոպացիներուն այդ արկածախնդրութենէն զգուշացնելնուս՝ պէտք է պատրաստուիլ Սուրիոյ մէջ սադրանքներու կրկնութեան»:

Քրեմլինի բանբեր Տմիթրի Փետրով իր կարգին յայտնեց. «Սուրիոյ դէմ արեւմտեան հարուածները կացութիւնը վատթարացուցին»:

«Քոմերսանթ» օրաթերթը Չորեքշաբթի օր հաղորդած էր, որ Ռուսիան մօտ օրէն կրնայ անհատոյց կերպով Սուրիոյ մատակարարել «Էս-300 Ֆաւորիթ» հակաօդային պաշտպանութեան համակարգեր:

Մերքել. «Գերմանիոյ Դեսպանատունը Երուսաղէմ Պիտի Չփոխադրենք»



Գերմանիոյ վարչապետ Անկելա Մերքել յայտնեց, որ կը մերժէ իր երկրին դեսպանատունը Թել Աւիւն փոխադրել Երուսաղէմ՝ հետեւելով Միացեալ Նահանգներու նախագահ Տանըլտ Թրամփի օրինակին:

Ան նշեց, որ Երուսաղէմի վերաբերեալ որեւէ համաձայնութիւն պէտք է գոյանայ երկու պետութիւններու լուծման պատկերացումի ծիրին մէջ բանակցութիւններու ճամբով:

Իսրայէլեան պատկերասփիւռի 10-րդ կայանին հետ հարցազրոյցի մը ընթացքին Մերքել շեշտեց, որ հակառակ մեծ դժուարութիւններուն եւ սակաւաթիւ յաջողութիւններուն, անհրաժեշտ է աշխատանքը շարունակել հասնելու համար երկու ժողովուրդներու համար երկու պետութիւններու լուծումին՝ աւելցնելով, որ Երուսաղէմի կարգավիճակը կարելի է ճշդէլ միայն այս ծիրին մէջ:

«Ուստի մեր երկրին դեսպանատունը պիտի չփոխադրենք Երուսաղէմ: Կ'ուզենք, որ Իսրայէլը ըլլայ հրեական եւ ժողովրդավարական երկիր, սակայն նաեւ պաղեստինցիներուն համար կենսունակ պետութիւն մը կ'ուզենք», ընդգծեց Գերմանիոյ վարչապետը:

Անդրադառնալով պաղեստինեփրայէլեան բանակցութիւններու սառեցման ու Այսրյորդանանի մէջ հրեական բնակեցման վայրերու կառուցման՝ Մերքել ըսաւ. «Կացութիւնը մեզ կը մտահոգէ»: Միւս կողմէ, իսրայէլեան լրատուամիջոցներ յայտարարեցին, թէ Միացեալ Նահանգներու նախագահի դուստրը՝ Իվանքա Թրամփն ու անոր ամուսինը՝ նախագահի խորհրդական Ճերարտ Քուշնըրը Միացեալ Նահանգները պիտի ներկայացնեն ամերիկեան դեսպանատունը Թել Աւիւն Երուսաղէմ փոխադրելու արարողութեան ընթացքին:

Իսրայէլի արտաքին գործոց նախարարութենէն պաշտօնատարներ իսրայէլեան «Հաարեց» օրաթերթին յայտնեցին, թէ կը նախատեսուի, որ ամերիկեան քոնկրետի անդամներ եւ Միացեալ Նահանգներու էլեւմուտքի նախարար Սթիւ Մուշըն եւս ներկայ գտնուին արարողութեան:

Յիշեցնենք, որ Իսրայէլի վարչապետ Պենիամին Նեթանիահու անցեալ ամիս Թրամփը հրաւիրեց ներկայ գտնուելու Երուսաղէմի մէջ ամերիկեան դեսպանատան բացումին, սակայն Միացեալ Նահանգներու նախագահը Սպիտակ տան աշխատանքներու օրակարգին պատճառով որոշեց ներկայ գտնուիլ եւ զինք ներկայացնող մը ուղարկել:

«Էրտողանի Դեմ Պայքարին Մէջ Պիտի Աջակցինք Կիւլին» Կ'ըսէ Քրտամէտ Երեսփոխան Սը

Թուրքիոյ քրտամէտ Ժողովուրդներու ժողովրդավարական կուսակցութեան երեսփոխան Զիյա Փիր խօսած է արտակարգ նախագահական ընտրութիւններուն ընթացքին Թուրքիոյ նախկին նախագահ Ապտիլլա Կիւլի թեկնածութեան իրենց կողմէ հաւանական առաջադրման մասին:

Ըստ ՏՀԱ-ի, ան նշած է, որ քրտամէտ կուսակցութեան մէջ Կիւլի թեկնածութիւնը առաջադրելու պահանջ կայ, իսկ եթէ առաջադրուի, իրենք միայն պիտի աջակցին անոր: «Այդ պատճառով Թուրքիոյ նախագահ Ռեճեփ Թայիփ Էրտողանի դեմ պայքարին մէջ անոր պիտի աջակցինք», ըսած է երեսփոխանը: Խօսելով նաեւ Թուրքիոյ մէջ տեղի ունենալիք արտակարգ խորհրդարանական ընտրութիւններուն մասին՝ ան յայտնած է, որ իրենց կուսակցութիւնը չի պատրաստուիր որեւէ քաղաքական ուժի հետ դաշինք կազմելու:

«Վեց Երկիրներ Պատրաստ Են Իրենց Դեսպանատունը Երուսաղէմ Փոխադրելու» Կ'ըսէ Նեթանիահու

Իսրայէլի վարչապետ Պենիամին Նեթանիահու յայտարարած է, թէ առնուազն վեց երկիր լուրջ բանակցութիւններ վարած են Իսրայէլի իշխանութիւններուն հետ՝ իրենց դեսպանատուները Երուսաղէմ փոխադրելու համար: Այս մասին կը գրէ «Թայմզ աֆ Իզրայէլ» օրաթերթը:

«Ես ուրախ եմ յայտնելու, որ առնուազն վեց երկիրներ մեզի հետ լրջօրէն խօսած են իրենց դեսպանատուները Երուսաղէմ փոխադրելու մասին: Շնորհակալ ենք, Կուաթեմալա, որ ասիկա կատարած էք: Ձեր քայլին պիտի հետեւին ուրիշները», նշած է Իսրայէլի վարչապետը՝ օտար երկիրներու դեսպաններուն առջեւ իր արտասանած խօսքին մէջ: Նեթանիահու նաեւ խոստացած է նախապատուական պայմաններ տրամադրել այդ քայլին դիմող առաջին 10 երկիրներուն:

Ռումանիա Որոշած Է Իսրայէլի Մէջ Իր Դեսպանատունը Փոխադրել Երուսաղէմ

Ռումանիոյ իշխող Ժողովրդավար-ընկերային կուսակցութեան ղեկավար Լիվիո Տրակնիա յայտնեց, որ իր երկիրը որոշած է հետեւիլ Միացեալ Նահանգներու օրինակին, եւ Իսրայէլի մէջ իր դեսպանատունը փոխադրել Երուսաղէմ՝ աւելցնելով, որ այդ առնչութեամբ աշխատանքը պիտի սկսի մօտ օրէն:

«Այս որոշումը խորհրդանշական մեծ իմաստ ունի, որովհետեւ Իսրայէլ միջազգային մակարդակի վրայ մեծ ազդեցութիւն եւ ամերիկեան վարչակազմին համար մեծ արժէք ունի», յայտնեց Տրակնիա՝ աւելցնելով. «Կը կարծեմ, որ այս որոշումը շահաւէտ պիտի ըլլայ Ռումանիոյ համար»:

«Հարցը նաեւ առնչուած է գործնապաշտութեան, եւ ինչպէս բոլորս, Իսրայէլ եւս իրաւունք ունի իր մայրաքաղաքը հաստատել հոն, ուր կ'ուզէ», նշեց ան:

ԱԿՆԱՐԿ

Միջազգային Հեղինակութեան Նոր Նշաձողերու Իրացում

Հայաստանի վարչապետի ընտրութեան ընթացակարգի մեկնարկի ճշդումը կը պարտաւորեցնէ ճգնաժամի հանգուցալուծման համար քաղաքական երկխօսութեան հարթակի արագ կայացումը եւ համապատասխան եզրայանգումներու արձանագրումը:

Մինչեւ այս պահը կայ համակողմանի մօտեցում՝ գործընթացները պահելու քաղաքակիրթ, խաղաղ սահմաններու մէջ, առաւել եւս՝ հանգուցալուծումները բերելու օրինական դաշտ: Թաւշեայ յեղափոխութեան դիմաց կար նաեւ թաւշեայ պետական արձագանգում՝ ուժի կիրարկումը բացառելու եւ ընթացակարգը սահմանադրական եւ մանաւանդ անցնցում պահելու:

Այն, ինչ որ տեղի ունեցաւ վերջին օրերուն, օրինակելի է ո՛չ միայն ներազգային, այլ նաեւ միջազգային մակարդակով: Գործընթացները իրողապէս բարձրացուցին Հայաստանի Հանրապետութեան միջազգային վարկը: Դժուար պիտի ըլլար յիշելը ժողովրդավարական կարգերով կառավարուող այլ երկիրներ, ուր անընդհատ ժողովուրդը շարքեր բողոքի գործողութիւններով ինքզինք կը դրսեւորէ՝ գիտակցելով, որ այդ գործողութիւններուն պէտք է տայ բացառապէս խաղաղ բնոյթ, Ռոբին դիմաց իրաւապահ մարմինները, հակառակ բերման ենթարկելու պարագայական կոշտ վերաբերումներու, ընդհանրապէս կը խուսափին պատահարներուն անհամաչափ ուժ ցուցաբերելու փորձութենէն:

Այստեղ առանձնապէս պէտք է ընդգծել նաեւ վարչապետին հրաժարական տալու արթին եւ թեքթին պետականութեան բարձր մակարդակը, ուր առաջնային կերպով գերադասուած էին՝ երկրի անդորրութիւնը, անվտանգութիւնը, համերաշխութիւնը:

Իրենց ամբողջութեան մէջ գործընթացները համակողմանիօրէն Հայաստանի Հանրապետութիւնը վերածեցին ժողովրդավարութեան մոտել պետութեան եւ հասարակութեան օրինակի:

Յաճախ, տարբեր առիթներով կատարուած վերլուծումներու մէջ, թե՛ իրաւական եւ թե՛ քաղաքական առումներով կը շեշտուին եւրոպական արժեհամակարգի որդեգրման անհրաժեշտութիւնը մեր երկրին կողմէ եւ այդ ուղղութեամբ փուլ առ փուլ պարտաւորութիւնները կատարելու պահանջներու յիշեցումները: Դժուար պիտի չըլլար ընկալելը, որ գէթ այս պարագային եւրոպական շատ մը երկիրներ գուցէ նաեւ անհրաժեշտութիւնը զգային որդեգրելու հայկական մոտելն ու պետական-հասարակական արժեհամակարգի դրսեւորած մօտեցումները:

Այս բոլորը կապ չունին անշուշտ մեկնող-գալիք իշխանութիւններուն գնահատականներու հետ: Այս բոլորը մինչ այժմ արձանագրուած-արձանագրուող գործընթացներուն ունեցած դրական ազդեցութեան կը վերաբերին՝ մեր երկրի միջազգային հեղինակութեան ու վարկի բարձրացման մէջ: Ի վերջոյ, համաժողովրդային կամքի կամարտայայտութիւն, որուն դիմաց՝ վարչապետի հրաժարական: Բախումներու բացառում, խաղաղ եղանակի որդեգրման եւ կիրարկման կոչեր, իրականացումներ եւ իրաւապահ մարմիններու արհեստավարժ գործելաձի առարկայացում եւ ուժի կիրարկումէ խուսափումի վճռականութիւն: Այս բնութագրումները կապ չունին նաեւ գէթ այսօր միանձնեայ ղեկավարութեամբ յատկանշուող համաժողովրդային ընդդիմութեան իշխանութիւն ստանձնելու պարագային անվտանգութեան եւ արտաքին քաղաքականութեան գերակայ ուղղութիւններուն հետ առնչուած հայեցակարգային անորոշութիւններու առթած տեղին մտահոգութիւններուն հետ:

Այդ հարցերը կան եւ պիտի յատկացուին տակաւին: Խնդիրը այսօր ժողովրդավարական դիմագիծի պայծառացման եւ միջազգային վարկաւորումին կը վերաբերի: Եւ բոլոր պատճառներն ու արդար ակնկալութիւնները կան, որ գիտակցական այս համակողմանի բարձր մակարդակը ինքզինք զգալի դարձնէ նաեւ հետագայ հանգուցալուծումներու գործընթացներուն՝ միշտ գերադասելով այդ բոլորին սահմանադրականութիւնն ու անոնց օրինական դաշտի մէջ կայացումը:

ԼՈՒՐԵՐ ԳԱՂՈՒԹՆԵՐԷՆ

**ՍՈՒՐԻՈՑ ՆԱԽԱԳԱՀԸ ԸՆԴՈՒՆԵՑ ԲԵՐԻՈՑ ՀԱՅՈՑ
ԹԵՄԻ ՆԵՐԿԱՅԱՑՈՒՑԻՉՆԵՐԸ**

Ինչպես նախապես տեղեկացուցած էինք, Հայոց Ցեղասպանության ոգեկոչման օրերու նախօրէին, Սուրիոյ նախագահ տոքթ. Պաշշար Ալ Ասատ եւ Առաջին Տիկին Ասմա Ալ Ասատ ընդունեցին Բերիոյ Հայոց Թեմի Առաջնորդ Գերշ. Տ. Շահան Արք. Սարգիսեանն ու Ազգային Վարչութեան եւ հայկական միութիւններու ներկայացուցիչները:

Նախագահը այս առիթով բարձրօրէն գնահատեց հայ համայնքին շինիչ դերը սուրիական հայրենիքին դիմագրաւած ծանր օրերուն:

Փայլանի Կոչը Թուրքիոյ Ժողովուրդին. «Նոյնիսկ Եթէ Մենք Չենք Կրնար Բուժել Այս Վերքը, Եկէք Գոնէ Միասին Սգանք»

Թուրքիոյ ընդդիմադիր Ժողովուրդներու Ժողովրդավարական կուսակցութեան անդամ, խորհրդարանի հայազգի երեսփոխան Կարօ Փայլան Հայոց ցեղասպանութեան զոհերու յիշատակի օրուան առիթով յատուկ կոչ յղած է Թուրքիոյ ժողովուրդին՝ յորդորելով առերեսուելու անցեալին հետ եւ դէմ կանգնելու ուրացման պաշտօնական քաղաքականութեան:



«Թուրքերը»-ի իր պաշտօնական էջին մէջ Փայլանի հրապարակած կոչը կը ներկայացնենք ստորեւ.

«Մեծ եղեռնէն մինչեւ օրս անցած է 103 տարի, սակայն այս հողերուն վրայ տեղի ունեցած եւ մարդկութեան դէմ կատարուած մեծագոյն յանցագործութեան՝ Հայոց ցեղասպանութեան հետ տակաւին չենք առերեսուած:

«Քանի որ այս յանցագործութեան հետ առերեսումը տեղի չէ ունեցած եւ անիկա անպատիժ մնացած է, այս հողերուն վրայ տեղի ունեցած են նաեւ այլ եղեռնագործութիւններ: Որովհետեւ անպատիժ մնացած իրաքանչիւր եղեռնագործութիւն պատճառ կը դառնայ նոր յանցագործութիւններու:

«Մինչդէռ ցեղասպանութեան՝ անցեալի ու ներկայի հետ առերեսումը կրնայ նպաստել մեր երկրի հասարակական խաղաղութեան հաստատման:

«Եկէք միասին դէմ կանգնինք ուրացման այս պաշտօնական քաղաքականութեան: Եկէք միասնաբար ջանք թափենք, որպէսզի իրականութիւնը բացայայտուի: Միասնաբար

յիշատակենք այս հողերու կորուստները, մե՛ր կորուստները: Նոյնիսկ եթէ մենք չենք կրնար բուժել այս վերքը, եկե՛ք գոնէ միասին սգանք»:

Յայտնենք, որ նախօրէին Փայլան խորհրդարանին մէջ յատուկ ասուլիս մը կազմակերպած է Հայոց ցեղասպանութեան զոհերու յիշատակի օրուան առիթով:

«Յարգելի՛ նախագահը արդէն 4-րդ տարին է՝ ցաւակցական ուղերձ կը յղէ հայ ժողովուրդին: Իսկապէս շնորհակալ եմ անոր ատոր համար, ատիկա ցաւը մեղմացնող հանգամանք է, իրօք շնորհակալութիւնս կը յայտնեմ, ատիկա քաջութիւն պահանջող քայլ է: Սակայն այստեղ պարոն նախագահը տեղի ունեցածը իր անունով չի կոչեր: Տեսե՛ք՝ կ'ըսուի «Համաշխարհային Ա. պատերազմի դժուարին ու բարդ պայմաններուն մէջ մահացած Օսմանեան կայսրութեան քաղաքացի հայերու...»: Բայց իմ տատիկը, իմ պապիկը պատերազմի պատճառով չեն մահացած, պարո՛ն նախագահ: Իմ տատիկն ու պապիկը զինուորներ չէին, անոնք արհեստաւոր էին, այգեգործներ, գիւղացիներ, ծերեր ու երեխաներ», ըսած էր Փայլան:

Պոլսոյ Ոստիկանութիւնը Արգիլած Է Ոգեկոչման Կարգ Մը Արարողութիւններ

«Տեմոքրաթիսապըր» կը հաղորդէ, որ Թուրքիոյ մէջ քրտամէտ ժողովուրդներու ժողովրդավարական կուսակցութեան կողմէ կազմակերպուած ցեղասպանութեան 103-րդ տարելիցի ոգեկոչման ընթացքին երեք անձեր ձերբակալուած են:

Անոնց ձերբակալութեան պատճառը այն է, որ ցոյցին ընթացքին օգտագործած են «Յեղասպանութիւն» եւ «ոճիր» բառերը, հակառակ անոր որ ոստիկանութիւնը նախապէս զգուշացուցած էր այդ բառերը օգտագործել:

Ամէն տարի Յեղասպանութեան ոգեկոչումներուն մասնակցող վերոյիշեալ կուսակցութեան անդամները մերժած են ոստիկանութեան պահանջքը կատարել: Այդ պատճառով ալ անոնց նախաձեռնած ոգեկոչումներու կայացումը արգիլուած է:

Ծաղկեպսակներու Ձետեղում Եւ Արեան Տուչութիւն՝ Հալէպի Մէջ

Կազմակերպութեամբ Հայ երիտասարդաց միութեան վարչութեան, Հալէպի «Արամ Մանուկեան» ժողովրդային տան դիմացէն հալէպահայ երեք համայնքապետները, Սուրիոյ խորհրդարանի երեսփոխան Ժիրայր Ռէյիսեան, հայկական երեք կազմակերպութիւններու եւ Ազգային վարչութեան ներկայացուցիչները, Հալէպի մէջ Հայաստանի գլխաւոր հիւպատոսը, Սուրիահայ օգնութեան խաչի, ՀՄԸՄ-ի, Համազգայինի, Ազգային Քարէն Եփփէ Ճեմարանի Շրջ. միութեան, ՍԵՄ-ի, պատանեկան միութեան եւ «Քրիստափոր» ուսանողական միութեան ներկայացուցիչները, ՀՄԸՄ-ի շեփորախումբին ընկերակցութեամբ քայլարշաւ մը կատարեցին դէպի Ս. Աստուածածին եկեղեցի, որուն շրջափակին մէջ գտնուող Հայոց ցեղասպանութեան յուշակոթողին դիմաց ծաղկեպսակներ գետեղեցին ու յարգանքի տուրք մատուցեցին Հայոց ցեղասպանութեան սրբադասուած նահատակներուն յիշատակին:

Ցեղասպանության 103-ամեակի Ոգեկոչումը՝ Քեմպրիճի Մէջ

Կիրակի, 22 Ապրիլին, Հայոց ցեղասպանության ոգեկոչման պաշտօնական հանդիսութիւնը տեղի ունեցաւ Քեմպրիճի Հայ կեդրոնի սրահին մէջ շուրջ 200 անձերու ներկայութեամբ: Այս մասին կը հաղորդէ «Հորիզոն»:

ՀՄԸՄ-ի սկաուտներուն առաջնորդութեամբ հիւրերը մուտք գործեցին սրահ, ուր ՀՕՄ-ի շաբաթօրեայ դպրոցի աշակերտները Քանասայի եւ Հայաստանի քայլերգներով բացումը կատարեցին ձեռնարկին:

Օրուան հանդիսավար Լեւոն Սարմազեան կատարեց բարի գալուստի եւ բացման խօսքը, որմէ ետք ՀՕՄ-ի աշակերտները դարձեալ խմբովին արտասանեցին Պարոյր Մեւակի «Մենք քիչ ենք» բանաստեղծութիւնը անգլերէնով, ապա ցուցադրուեցաւ երաժշտական տեսերիզ մը Ռիչըրտ Լէյպի եւ Ալին Թոփճեանի կատարողութեամբ՝ նուիրուած Եղեռնի զոհերուն:

Հանդիսավարը ներկայացուց օրուան պատգամաբերը՝ Տիթոյիթ նահանգի «Ուէյն Սթէյթ» համալսարանի դասախօս Հայկ Օշականը եւ անդրադարձաւ անոր գործունէութեան:

Օշական սկսաւ իր պատգամը յիշելով իր մեծ հօր՝ Յակոբ Օշականի եւ անոր կնոջ Եղեռնի ողիսականը, որ նման է իւրաքանչիւր վերապրող հայու ցաւալի փորձառութեան:

Ան յայտնեց, որ Ցեղասպանութեան վերջին ծրագրուած փուլը եղաւ անոր ժխտումը՝ կիրարկուած թրքական պետութեան կողմէ. օրինակ՝ դպրոցներուն մէջ չի դասաւանդուիր իրական պատմութիւնը, որ կը վերաբերի հայութեան, ցեղասպանութիւն բառը գործածողներ կը պատժուին, իսկ պատմական Հայաստանի մէջ հայութեան հետքերը կ'անհետանան օրէ-օր®

Ան յայտնեց, որ Հայ դատի գծով մեր աշխատանքը պէտք է շարունակուի, արդէն 25 երկիրներ ընդունած են Հայոց ցեղասպանութիւնը, որուն պիտի յաջորդէ վնասուց հատուցման դատական փուլը:

Խօսք առին նաեւ քաղաքական այլ գործիչներ, որոնք իրենց պատգամները ուղղեցին տեսերիզի միջոցով:

Վարչապետ Ճասթին Թրուտոյի նամակը կարդաց Պրայըն Մէյ, իսկ Պահպանողական կուսակցութեան (ընդդիմադիր) ղեկավար Էնտրու Շիրի նամակը՝ Հարոլտ Ալպրէխթ:

Վեր. Յովհաննէս Սարմազեանի աղօթքով եւ Ս. Նշան եկեղեցւոյ հովիւ Յովհաննէս վրդ. Սաղտճեանի պահպանիչով վերջ գտաւ ձեռնարկը:

www.aztarar.com

ԱՅԼԱԶԱՆ

Ատամնահատիկ



Ատամնահատիկը հին հայկական ժողովրդական տօն է: Անցելիս անհկա ուներ պտղաբերութեան եւ առատութեան խորհուրդ: Տարբեր բարբառներու մէջ անհկա տարբեր անուններ ուներ. օրինակ՝ Վայոց Ձորի մէջ՝ կեռահատիկ, Արարատեան դաշտի մէջ՝ հատիկ, Շիրակի մէջ՝ ակռահատիկ, Սիւնիքի մէջ՝ ատամնամստիկ կամ սեղքահատիկ:

Ի՛նչ ալ կոչուի, ազգագրագետները այս նշումը կը համարեն ծես եւ ոչ թէ՛ խնճոյք: Սովորութիւն էր, որ տան տատիկը պէտք էր ընդդէմի եւ ոլոռազգիներու խառնուրդ պատրաստը՝ խաշած ցորենի, սիսեռի, լուբիայի, գարիի հատիկներով. երբեմն նաեւ կ'աւելցնէին պտուղներ, օրինակ՝ չամիչ, ծիրան, սալոր եւ ընկոյզ:

Ազգագրագետներուն կարծիքով, 7 տեսակի հատիկ լեցնելու սովորութիւնը պարտադիր չէ, այլ՝ սնահաւատութեան պէս բան մը: Ինչպէս ծանօթ է, հատիկեղէնները առատութիւն կը խորհրդանշեն: Այդ խորհրդանիշը փոխանցելու եւ մնացեալ ակռաներուն «ծլում»-ը դիւրացնելու նպատակով երեխային շուրջ կը հաւաքուէին հարազատները, զայն կը նստեցնէին սեղանին վրայ, գլուխը կը ծածկէին քողով եւ հատիկները կը թափէին վրան:

Տարիներու ընթացքին ատամնահատիկի ծեսը վերածուեցաւ մասնագիտութիւն կանխագուշակելու սովորութեան: Նախապէս փոքրիկին առջեւ կը դնէին երեք պարտադիր իր՝ հայելի, սանտր եւ դանակ: Հայելին կը խորհրդանշէր առատութիւնը, չէ՞ որ ան կը բազմապատկէ այն ամէնը, ինչ կը յայտնուի իր արտացոլանքին մէջ, դանակը կը խորհրդանշէր ուժը, իսկ սանտրը՝ ակռաներու հաւասարութիւնը:

Մեր օրերուն ծեսը կերպարանափոխուած է: Ծնողները զայն վերածած են իսկական խնճոյքի: Նախապէս տունը կը յարդարեն ակռայի պատկերներով, ճոխ սեղան կը պատրաստեն, ակռայի տեսքով կարկանդակ կը պատուիրեն, մինչեւ իսկ տարոսիկներ կը բաժնեն: Յետոյ կը հասնի ամենասպասուած պահը. ներկայիս երեխային առջեւ կը դնեն մասնագիտութիւն խորհրդանշող իրեր՝ դրամապանակ, բժշկական գործիք, գիրք, գրիչ, մկրատ, համակարգիչի մկնիկ, մուրճ, խաղալիք օդանաւ եւ այլն... Ոմանք մասնագիտութիւնները կը գրեն թղթիկներու վրայ, կը ծալեն ու կը դնեն փոքրիկին ոտքերուն մօտ: Շատեր ալ նոյն այդ թղթիկները կը դնեն գունաւոր փուչիկներու մէջ:

Իրերով կամ գրութեամբ պայմանաւորուած՝ ծնողները կը կանխատեսեն, թէ ի՛նչ մասնագիտութիւն պիտի ընտրէ երեխան, երբ մեծնայ:

Այս ծեսը ընկալենք որպէս խաղ եւ միշտ յիշենք, որ ամենամեծ կանխագուշակը ծնողքի դաստիարակութիւնն է: Ինչ արժէքներ սերմանենք փոքրիկին մէջ, այդպիսի արժէքներով առաջնորդուելով՝ ան կ'ընտրէ իր մասնագիտութիւնը: Իսկ թէ՛ ի՛նչ մասնագիտութիւն, ձգենք, որ ան որոշէ:



Հ Ր Ա Ի Է Ր

ԵՊԻՍԿՈՊՈՍԱԿԱՆ ԱՆԴՐԱՆԻԿ ՊԱՏԱՐԱԳ
ՈՒՐԱԽՈՒԹԵԱՄԲ ԿՈՒ ԳԱՆՔ ՏԵՂԵԿԱՑՆԵԼՈՒ

ՄԵՐ ՍԻՐԵԼԻ ԺՈՂՈՎՈՒՐԴԸ, ՈՐ ՈՒՐԲԱԹ, 4 ՄԱՅԻՍ 2018-ԻՆ
ՔՈՒԷՅԹԻ ՍՐԲՈՑ ՎԱՐԴԱՆԱՆՑ ԵԿԵՂԵՑԻՈՅ ՄԷՋ

ԳԵՐՇ. Տ. ՄԱՍԻՍ ԵՊՍ. ԶՕՊՈՒՅԵԱՆ
ԱՌԱՋՆՈՐԴ ՔՈՒԷՅԹԻ ԵՒ ՇՐՋԱԿԱՅԻՑ ՀԱՅՈՑ ԹԵՄԻ

ԻՐ ԱՆԴՐԱՆԻԿ ԵՊԻՍԿՈՊՈՍԱԿԱՆ ՊԱՏԱՐԱԳԸ ՊԻՏԻ ՄԱՏՈՒՑԷ
ԵՒ ՊԱՏԳԱՍԸ ՓՈԽԱՆՑԷ:

ԱՌԱՋՆՈՐԴ ՍՐԲԱԶԱՆ ՀԱՅՐԸ ՊԱՏԱՐԱԳԷՆ ԵՏՔ ՊԻՏԻ ԸՆԴՈՒՆԻ
ԹԵՄԻՍ ԶԱԻԱԿՆԵՐՈՒՆ ՇՆՈՐՀԱԻՈՐՈՒԹԻՒՆՆԵՐԸ:

Սկիզբ Սուրբ պատարագի՝ ժամը 11:30
Քարոզ՝ ժամը 12:30
Շնորհաւորութիւն՝ ժամը 1:00 - 3:00

Դիւան Ազգային Առաջնորդարանի

